

四庫全書薈要·乾隆御覽本

集部

欽定四庫全書薈要

集部

石湖詩集卷

二十八至  
三十一

詳校官助教臣謝登萬



石湖詩集卷二十八

宋 范成大 撰

送聞人伯卿赴銅陵

雪壓關山畫掩扃，故人何事短長亭。  
折腰直為瓶無粟，便腹猶憐笥有經。  
牒訴塵埃頭更白，簡編燈火眼終青。  
可憐東壁輝光外，寥落江湖處士星。

重送伯卿

雪花來無時入春遂三作冰柱凍不解去地纔一握東  
風畏竒寒未敢破梅萼已僵員嶠蠶那問紆干雀萬徑  
無行蹤扣戶驚剝啄故人竹葉舟歲晚夢漂泊白云飢  
所驅豈不念丘壑經誼金華省文采石渠閣平生百未  
試墨綬嚇猿鶴取舍一熊掌得喪兩蝸角不嫌干進鈍  
俯仰無愧怍低回簿書叢萬卷無處著惜哉小舉袖負  
此不龜藥頗聞江臯縣訟簡民氣樂政成松竹林詰訓  
新家學迺翁力蓄畬待子收播穫三年此書出衆說眇

螢爝持歸許窺觀慰我久離索今朝雲溼墨霰雨縱橫  
落檣竿挽不住帆峭北風惡難忘昆弟語易散清夜酌  
忽忽別知賦掩涕倚郭郭

送壽老往雲間行化

天平船子過華亭舍衛城中次第行留取鉢盂歸院洗  
東巖新出一泉清

次韻知府王仲行尚書鹿鳴燕古風

昔人重遠行供帳餞出祖矧今燕嘉賓宜有贈行語府

公文章公青紫拾芥取聯翩二百言字字勸稽古戒之  
書魚蠹勉以雲鵬舉作霖要實用洗兵嫌不武諸生承  
意氣脫迹蛻農圃明年一聲雷幽蟄起平楚班行入鵷  
鷺榜貼綴龍虎回頭謝府公公言非漫與府公亦廟廊  
來蒞瓊林俎千載吳趨行愁絕白紵舞我聞有此作病  
卧嗟未睹今晨梅驛動副墨到衡宇調高瑟音希芒寒  
劍光吐誰云鹿鳴廢正賴廣微補當年羣玉會方駕肅  
飈羽倡酬久寂寞邂逅相勞苦世故萬浮雲交情一舊

雨誰當將詩壇君實東道主

苦寒六言

簷冰低挂闌角隙雪斜侵坐隅春後一寒如此梅花有  
信來無

丁未春日瓶中梅殊未開二首

暖閣無人到寒枝為我橫情鍾吹葉破靜極覺香生老  
去魂休斷春來眼且明逃禪時索笑百匝傍窻行

夜雪臘前凍朝陽春後蘓人憐疎葉瘦花笑病翁臞露

白能多少尋春似有無詩催全不力煮水換銅壺

再題瓶中梅花

園林籬落凍芳塵南北枝間玉蕊皺風袂挽香雖淡薄  
月窓橫影已精神雪霜春事年年晚今古詩情日日新  
鐵石如翁猶索句真成嚼蠟對橫陳

王仲行尚書錄示近詩聞今日勸農靈巖次韻紀  
事

館娃宮殿壓雲頭自昔登臨隘九州雪浪長風三萬頃



蒼煙古木二千秋，賓僚誰伴作詩苦。  
父老競傳敷政優，想見歸驂穿夜市。  
月邊燈火滿西樓。

仲行再示新句復次韻述懷

神仙懶學古浮丘，祖意慵參老趙州。  
四壁塵埃心似水，一生風露鬢先秋。  
病衰謹謝吳中客，技拙甘同楚國優。  
斥鷃蓬蒿元自足，世間何必卧高樓。

李子永赴漂水過吳訪別戲書送之

萬壑斷流冰塞川，千巖森玉雪漫天。  
匆匆葉縣雙鳧鳥。

換却山陰訪戴船

犯寒書劍出春蘿  
風雪橋邊得句多  
牒訴繽紛似煙海  
梅花時節奈君何

民病春疫作詩憫之

乖氣肆行傷好春  
十家九室寒螿呻  
陰陽何者強作孽  
天地豈其真不仁  
去臘竒寒念似鐵  
連年薄熟甌生塵  
疲旼憊矣可更病  
我作此詩當感神

題夫差廟

縱敵稽山禍已胎垂涎上國更荒哉不知養虎自遺患  
只道求魚無後災夢見梧桐生後圃眼看麋鹿上高臺  
千齡只有忠臣恨化作濤江雪浪堆

翻襪菴夜坐聞雨

閒門冷落靜無譁小閣簾幃密自遮日晚課程丹竈火  
夜深光景佛燈花人生寧有病連歲身世畧如僧在家  
步屨尋春非老伴任教風雨喚雷車

睡起

慙慙與世共兒嬉兀兀從人笑我癡  
間裏事忙晴晒藥  
靜中機動夜爭棋  
心情詩卷無佳句  
時節梅花有好枝  
熟睡覺來何所欠  
蘊根香軟飯流匙

賞海棠三絕

芳春隨分到貧家  
兒女多情惜歲華  
聊為海棠修故事  
去年燈燭去年花

燭光花影兩相宜  
占斷風光二月時  
但得常如妃子醉  
何妨獨欠少陵詩

憶向宣華夜倚闌花光妍煖月光寒如今蹋颯嫌風露  
且只銅瓶滿插看

午寔遣興家人謀過石湖

雲日初收破柱雷小窓坐穩興悠哉燠爐花氣朝醒解  
茶鼎松風午夢迴謝客門闌風動竹惜春時節雨肥梅  
畫船破浪亦一快聞道湖光如潑醅

將至石湖道中書事

水綠鷗邊漲天青雁外晴柳堤隨草遠麥隴帶桑平白

道吳新郭蒼煙越故城稍聞鷄犬鬧僮僕想來迎

三月十六日石湖書事三首

春事日以闌暑陰正清美拖筇入林下秀綠照衣袂  
盧橘梅子黃櫻桃桑椹紫荷依浪花顛筍破苔色起風日  
收宿陰物色有新意鄰曲知我歸爭來問何似病惱今  
有無加飯日能幾掀髯謝父老衰雪已如此

種木二十年手開南野荒苒苒新歲月依依舊林塘  
汗菜擅下濕岑蔚驕衆芳菱母尚能瘦竹孫如許長憶初

學圃時戴笠冒風霜今茲百不堪裏帽人扶將龍鍾數  
能來猶勝兩相忘

湖光明可鑑山色淨如沐閒心愜舊觀愁眼快竒矚依  
然北窓下凝塵滿書簾訪我烏皮几拂我青氊褥荒哉  
賦遠遊幸甚遂初服老紅餞餘春衆綠自幽馥好風吹  
晚晴斜照入疎竹兀坐胎息勻不覺清夢熟

或勸病中不宜數親文墨醫亦歸咎題四絕以自  
戒末篇又以解嘲

作字腕中百斛吟詩天外片心習氣吹劍一吹病軀垂  
堂千金

意馬場中汗血隙駒影裏心灰吉蠲筆墨安用付與蛛  
絲壁煤

詩成徒能泣鬼博塞未必亡羊剛將妄言綺語認作錦  
心繡腸

師燭尚合餘燼羹熟休吹冷葢解醒縱無五斗且復月  
攘一鷄



送遂寧何道士自潭湘歸蜀

塵埃波浪幾東西歸去簞瓢挂杖藜  
戊巳爐中真造化  
功成分我一刀圭

書劍飄然席未溫  
火雲撲地暑煙昏  
山黃水濁湖南路  
竹月荷風憶范村

立秋二絕

戴楸葉食瓜水吞赤小豆七粒皆吳中節物也

三伏熏蒸四大愁  
暑中方信此生浮  
歲華過半休惆悵  
且對西風賀立秋

折枝楸葉起園瓜赤小如珠  
燕井花洗濯煩襟酬節物  
安排笑口問生涯

秋雷歎

吳諺云秋  
季轆損萬斛謂立秋日雷也

立秋之雷損萬斛吳儂記此占年穀  
汰哉豐隆無藉在  
政用此時鳴季轆向來夏旱連三月吁嗟  
上訴聲滿屋  
訟風未慙復占雷助魃為妖天更酷我  
雖閒寂忝祠史  
家請官供尚倉粟塵甑貧交滿目前卒  
歲將何救枵腹  
但願吳儂言不驗共割黃雲炊白玉  
天人遠近巨戲論

裨竈安能尸禍福

用漢中帥閻才元侍郎韻送樊子南西歸兼呈侍  
郎

萬里山巔與水涯春風招看杏園花向來科第直溷子  
此去文章應滿家休學遊仙窮越舊且從知己控袞斜  
南樓東望當思我藥裏堆中兩鬢華

子南嘗自岷山西  
遊窮探勝境多見

異人南樓  
侍郎新作

書樊子南遊西山二記後

仙山草木鎖卿雲不到花平不離塵十丈牡丹如錦蓋  
人間姚魏却爭春

右牡丹瓶

春晚娑羅百葉開仙翁精舍長蓬萊朝元未罷門深閉  
不管人間有客來

右大面

題天平壽老方丈

二十三年再入山此山於我有前緣時人不用憐衰病

天與丹房一線泉

壽老近於半山石壁之中得泉眼如筋清泉如一線涓涓而出大旱不增

減欲為余作小菴於泉傍以煉丹云

再遊天平有懷舊事且得卓菴之處呈壽老

訪舊光陰二十年殘僧相對兩依然木蘭已老無花發  
石竹依前有麝眠萬戶直須龜手藥一龕何用買山錢  
從今半座須分我共說昏昏一覺禪

重九日行營壽藏之地

家山隨處可行楸荷鍾攜壺似醉劉縱有千年鐵門限

終須一箇土饅頭三輪世界猶灰劫四大形骸強首丘  
螻蟻烏鳶何厚薄臨風拊掌菊花秋

得壽藏於先隴之傍俯酬素願感慨交懷

密邇松楸地一隅會心何必問青烏亢宗雖愧鎮西子  
沒世尚從先大夫京兆漢阡賢問望邢山鄭冢儉規模  
家庭遺訓焄蒿在不學邠卿畫古圖

晚登木瀆小樓

萬象當樓繡繡張闌干一士立蒼茫雲堆不動山深碧

星出無多月淡黃宿鳥盡時猶數點歸鴻驚處更斜行  
松陵政有鱸魚上安得長竿坐釣航

題秋鷺圖

昨夜新霜冷釣磯綠荷消瘦碧蘆肥一江秋色無人問  
盡屬風標兩雪衣

送蘓秀才歸永嘉

再入庭闈再入山偷閒百日了金丹他年拔宅上升後  
休道使親忘我難

大道凝神術養形形神俱煉始功成  
勸君觀妙還觀微  
先作頑仙地上行

東宮壽詩

丁未年

有赫題期盛無疆嗣歷昌  
中興歸濬哲重慶啓元良  
兩亥開基遠三丁系統長

恭惟藝祖太宗皇帝元命皆在  
亥今太上主上殿下元命皆在

丁帝咨同物瑞人卜降年祥離日融  
雙照乾天秉少陽  
晨昏周内寢詩禮舜巖廊極右辰居  
煥心前火德光與  
齡偕聖父得壽協虞皇  
銅律風占允瑤山樂奏商  
蕙芳



鄰五位菊色麗中央視膳班衣拱傳觴玉契將宸楓霜  
獻葉仙桂月輸香薰炷爭延祝吟牋曷讚揚形容仁與  
孝步障有雲章

送同年朱師古龍圖赴潼川

杏園耆舊如晨星白頭相對眼故青奉常禮樂照東蜀  
十年清名留漢廷蜀人咸佑天恩厚高議清陰猶記否  
邇來聞道更蠲除此段始終君一手歸見岷峨無愧詞  
父老笑迎還歎咨賈生未可去宣室屯膏一州誰謂宜

魏闕江湖關出處  
抬頭不用催  
鳴榔遙知夢境尚京塵

啞咤滿船聞魯語

蜀士仕於朝者所買婢妾例不肯隨歸獨師古家無一人肯相舍傳以為

奇事蜀人以中原語音為魯語

題趙希遠案鷹圖

學射春山萬歲湖  
牙門列騎卷平蕪  
如今黃土原邊夢  
猶識呼鷹啖犬圖

題朱元暉吳興山水橫卷

道場山麓接何山  
影落苕溪浸碧瀾  
只欠荷花三十里

楸頭船上把漁竿

圍田歎四絕

萬夫陘水水乾源障斷江湖極目天秋潦灌河無洩處  
眼看漂盡小家田

山邊百畝古民田田外新圍截半川六七月間天不雨  
若為車水到山邊

壑鄰罔利一家優水旱無妨衆戶愁浪說新收若干稅  
不知逋欠萬新收

臺家水利有科條膏潤千年廢一朝安得能言兩黃鵠  
為君重唱復陂謠

素羹

蘊芋凝酥敵少城土諸割玉勝南京合和二物歸藜糝  
新法儂家骨董羹

夜雨

燭花垂穗伴空齋心事如灰入壯懷老倦更闌惟熟睡  
任他疎雨滴空階

野景

菰蒲聲裏荻花乾  
鷺立江天水鏡寬  
畫不能成詩不到  
筆端無處著荒寒

除夜地爐書事

節物間門裏  
人情老境中  
雁聲凌急雨  
燈影戰斜風  
糟醕新醕白  
柴錐軟火紅  
家人歡夜話  
我已困蒙茸

吳人酌酒

瓮浮醕謂之釀  
醕酒之精英也

元日立春感歎有作二首

元日兼春日霜寒又雪寒併煩傳菜手同捧頌椒盤  
疊膝稀穿履扶頭懶正冠五年如此度寧得諱衰殘

元日兼春日間身是老身行年申直戊交運丑支辛豈  
敢期安佚聊希利鈍屯兒童看書戶把筆已如神

古鼎作香爐

雲雷縈帶古文章子子孫孫永奉嘗辛苦勒銘成底事  
如今流落管燒香

偶書

捏目華中影現身有為皆妄懶方真已甘捐捐勤為圃  
休向滔滔苦問津書至五千空拄腹錢非十萬不通神  
君看汙簡沉碑者隨水隨風幾害塵

太上皇帝靈駕發引輓歌詞六首

紹運鍾陽九興王撫半千斷鼇媧立極翔鳳漢中天宵  
盱三星紀希夷十閏年聲容彌宇宙浯石不勝鐫

自將吳津騎誰嬰泰一鋒旄頭連夜落京觀隔江封舞  
武三成備書文九譯重修攘遺策在嗣聖續車攻

簫勺妖氛靜甄陶叶氣還春回慈殿駕天作祐陵山開  
闢風雲慘登平日月間艱難雖獨瘖壽域徧人間

傳聖家人禮凝神象帝先勲華今歷數汾社古山川衆  
父尊歸父中天更有天壽宮何所厭亟上白雲仙

帝業雖天廣皇心本谷虛神應游混沌夢不返華胥按  
德難涯涘銘功總緒餘誰能言大道第八四墳書

文德克新廟威靈禹舊山海門賓羽衛地軸啓雲關無  
路攀仙駕當年拱聖顏小臣衰疾淚空望帝鄉潛



別擬太上皇帝輓歌詞六首 不進

身濟投艱業時乘撥亂機荆榛荒帳殿風雨類戎衣有

日臨黃道無星彗紫微至今淮海上猶詠六龍飛

太上皇帝

初載御製詩云六龍轉淮海萬騎臨吳津

大孝天孚佑精誠敵可摧龍輜遷座至駸馭及泉回永  
祐千章木慈寧萬壽杯古今無此事絕德詔方來

斂福開皇極儲祥握赤符寇降千猘猱客拜兩單于遺詔

之下淮北父老涕泣曰太上皇帝真主也實受  
北敵兩朝之拜謂亶亮二王皆嘗在聘使中洗甲民

安枕垂衣國覆盂有生何以報壽域亘綿區

與子傳神器承家得聖人階庭天下養壺嶠海中春  
四葉斑衣樂三加玉冊新壽宮如帝所何必上霄晨

舞羽修文後投歌講藝時天章雲漢麗國典日星垂麟  
絕仲尼筆狹啼神禹碑傷心河洛水無處問龍龜

甫賀蠅傳赦俄驚鶴馭風首山銅鼎就前殿玉卮空日  
豈揮戈及天無鍊石功如何千萬壽不待九齡終

送許耀卿監丞同年赴靜江倅四絕

南國春深雁欲回  
湘江花浪一帆開  
知君不為驂鸞去  
直為淵明五斗來

羅帶江流碧玉峰  
舊游如夢一星終  
煩披蘚石尋題字  
定有人能記此翁

鴈塔交親比斷金  
故人歲晚更情深  
只今不隔同年面  
想見青雲異日心

官塗真有上竿魚  
玉筍翻乘別駕車  
聞道留行有公論  
從今日日看除書

石湖詩集卷二十八

石湖詩集卷二十九

宋 范成大 撰

次韻虞子建見咍贖帶作醮

齋祠難著野衣冠  
旋贖金章始見閒  
台架塵侵毬路暗  
花書墨漬笏頭斑  
當年駟騎傳呼賜  
此日村童拂拭還  
若比前廳荒驛舍  
見存猶可一開顏

兒女傳觀省見稀  
病身聊復借光輝  
莫嫌憔悴沈腰瘦

且喜間關秦璧歸不是典來還酒債亦非將去換蓑衣  
塵魚甌釜時相阨微汝誰能為解圍

顏橋道中

村村籬落總新修處處田疇盡有秋一段農家好風景  
稻堆高出屋山頭

上沙舍舟

村北村南打稻聲竹輿隨處欸柴荆斜陽倒景天如醉  
明日山行更好晴

宿閭門

五更潮落水鳴船  
霜送新寒到枕邊  
報道霧收紅日上  
野翁猶蓋短篷眠

攜家石湖賞拒霜

水上晴雲綵  
竦橫許多蜂蝶  
趁船行  
漁樵引入新花塢  
兒女扶登小錦城  
艷粉發粧朝日麗  
濕紅浮影晚波清  
誰知搖落霜林畔  
一段韶光畫不成

壽櫟東齋午坐

屋角靜突兀雲氣低鴻濛殘葉颭疎雨孤花側淒風北  
憲午睡起一笑萬事空無人共此意莎堦咽微蛩

晚思

蘇牆莎砌響幽蟲睡起繡書覺夢中殘暑一窓風不動  
秋陽入竹碎青紅

壽標堂枕上

禪牀初著小山屏夜久秋涼枕席清鬢飛蚊妨好夢  
卧聽簷雨入池聲



宿妙庭觀次東坡舊韻

桂殿吹笙夜不歸  
蘓仙詩板挂空悲  
世人舐鼎何須笑  
猶勝先生夢石芝

升降三田自有丹  
浪尋盤鼎斲仙壇  
扣門倦客惟思睡

容膝菴中一枕安  
觀為董雙成故宅元祐間修造掘地得琉璃盤銅鼎中有丹已而盤碎失

丹惟鼎存坡詩蓋紀其事鼎後為宣和殿取去

餘杭初出陸

村媪羣觀笑老翁  
宦途何處苦龍鍾  
霜毛瘦骨猶千騎

少見行人似箇儂

桐廬江中初打槳

二十年前鬢未斑  
下灘歸路落潮乾  
如今衰雪三千丈  
却趁潮平再上灘

釣臺

久矣心空客路埃  
茲行端為主恩來  
杜陵詩是吾詩句  
卧病且登江上臺

和豐驛

晚境惟於閉戶宜出門惟有病相隨四方雖是男兒志  
莫忘柯山在莒時

次韻龔養正病中見寄

衰翁埽軌欲垂車怪子頽然也向隅激水要令風在下  
涸泉翻以沫相濡瘠肥邈爾自秦越勢利紛然皆耳餘  
且復放船來話舊不妨蓮葉卧看書

題蜀果園四首

木瓜

沈沈黛色濃  
糝糝金沙絢  
却笑宣州房  
競作紅粧面

櫻桃

火齊寶瓔珞  
垂於綠繭絲  
幽禽都未覺  
和露折新枝

石榴

日烘古錦囊  
露浥紅瑪瑙  
玉池燕清肥  
三彭跡如掃

甘瓜

夏膚粗已皴  
秋蒂熟將脫  
不辭抱蔓歸  
聊慰相如渴

李粹伯侍御挽詞二首

奕葉邯鄲後乘驄第一人  
交情多舊雨到處有陽春  
磊落功名意摧頽夢幻身  
黃壚高可隱何地著經綸  
公昔參敷納人期到辨章  
珠光空月皎玉氣忽虹藏  
歲晚東方騎生平北海觴  
玳簪風雨散幾客奠楸行

次韻袁起巖提刑遊金焦二山二首

二山巉絕照南州  
俯看千檣總芥舟  
日脚鎔金浮巨浸  
波聲翻雪撼高丘  
鍾聞兩岸詩無敵  
口吸西江話已酬  
別有英雄懷古意  
他年擊楫誓中流

憶曾歸自雪邊州，帆落中濡小繫舟。  
食蛤坐來期汗漫，駕鴻飛去揖浮丘。  
卧遊久矣無登覽，辱贈足然有唱酬。  
寂寞東臯舒嘯後，為君濡筆賦臨流。

次韻謝鄭少融尚書為壽之作

交游稀似曉來星，歲月飄如水上萍。  
桂海宦情詩可紀，吳山別恨酒難平。  
我今以病為欣戚，公合於時繫重輕。  
安得故人來話舊，碧空日日暮雲生。

近見尚書再和桂林詩成大興尚書

相別於桂林  
今十二年矣

鄭少融尚書初除端殿以書見及賦詩為賀

敬老尊賢大政初速郵響動報新除即從光範開門館  
先向文明直殿廬後日沙堤新宰相當年草履舊尚書  
鋒車若向吳中路應記南山有荷鋤

書事三絕

爨婢請淘酒米園丁催算花錢如許日生公事誰云窮  
巷蕭然

日日處方候脉時時推筴禳災門外雖無車轍醫生卜

叟猶來

簡子約同湖棹周郎許過田廬碧雲日暮空合多病故人遂疎

親鄰招集強往便歸

樂天漸老欲謀歡大似蒸砂不作團已覺笙歌無煖熱仍嫌風月太清寒氣衰況復三而竭心賞尤於四者難却恐人嫌情太薄聊將花作霧中看

次韻表起巖常熟道中三絕句



小雨蕭寒破晚晴  
疎疎密密滴簷聲  
烏鴉盤舞黃雲亂  
早與商量雪意生

仄徑難勝四牡駢  
扁舟辛苦鑿冰歸  
簡書鞅掌吟詩苦  
并與東陽減帶圍

使君橫槩賦詩回  
斷取天風海雨來  
綵筆從今閒不得  
雪花梅蕊一時開

次韻來起巖許浦按教水軍二絕句

橫波組練試揚舲  
風捲魚龍海欲凝  
但得綈袍如挾纊

何妨鐵甲冷如冰

戈船戰櫂疾如飛莫遣潮沙澱海湄  
草奏直須窮利病  
奉身從此繫安危

次韻起巖喜雪

吹成一雪便吹殘風伯無端豈坐慳  
夜報飛花平瓦墮  
曉驚疎雨落簷間休教凍解魚龍水  
更待誠通虎豹關  
准擬姑蘓臺上看春前三度老青山

素詩猶以雪未甚積必念此意當益

感通

笑

枕上聞雪復作方以為喜起巖再示新詩復次韻  
三白何憂稼穡艱天於玉粒未吾慳不知夜色明空外  
但覺朝寒到夢間誰子騎驢吟灞上何人跋馬客藍關  
爭如睡熟蒲團上靜聽飢鴉啄屋山

起巖又送立春日再得雪詩亦次韻

十分佳景媚冬殘好事天心不復慳已遣梅花斜竹外  
更飄瑞葉向人間漁蓑晚色都堪畫羌笛春光亦度關  
想得東風來處路白銀宮闕鎖三山

同年楊廷秀秘監接伴北道道中走寄見懷之什  
次韻答之

昨遣長鬚迓詩老人言已過閭門了梅邊腸斷傍寒溪  
詩老官忙應未知何時真訪山中許已辦竹深留客處  
只恐歸程官更忙天駒催上沙堤去

曉枕聞雨

暗淡更殘景低迷病酒懷別燈寒作伴添被厚如埋膽  
冷都無夢心空却似齋地爐煎粥沸聽作雨鳴堦

雪意方濃復作雨

擬看飛花陣翻成建水聲  
雨吾寧不識雪汝幾時成  
三白從今卜千倉待此盈  
黃雲如有意青女莫無情

春朝早起

莫笑眠常早還憐起不遲  
穠香溫夜氣小雨濕春姿  
瘦比中年甚寒惟病骨知  
羨渠兒女健繞屋探南枝

詠懷自嘲

簷溜春猶凍門扉曉未開  
退閒驚客至衰懶怕書來  
日

日教澆竹朝朝遣探梅園丁應竊笑猶自說心灰

早衰

早衰頭腦已冬烘信拙心情似苦空僚舊姓名多健忘  
家人長短總佯聾一窻暖日棋聲裏四壁寒燈藥氣中  
晚景只消如此過不堪拈出教兒童

習閒

習閒成懶懶成癡六用都藏縮似龜雪已許多猶不飲  
梅今如此尚無詩閒看猫暖眠氈褥靜聽鴉寒叫竹籬

寂寞無人同此意時時惟有睡魔知

一龕

一龕窄似鳥窠禪世界悠悠任大千與老有情冬後煖  
去仙無幾日高眠斫開竹後初三選忘却詩來又一年  
破戒忽題無味句劣能成字不成篇

陰寒終日兀坐

東風微解綴簷冰仍喜朝來井水清臘淺得春全未煖  
雪慳和雨最難晴小窻日煖猶棋局窮巷更深尚屐聲

莫把摧頰嫌暮景且將閒散替勞生

親戚小集

避濕違寒不出門一冬未省正冠巾  
月從雪後皆奇夜天向梅邊有別春  
秉燭登臨空話舊擁爐情味莫懷新  
榮華勢利輸人慣贏得尊前現在身

立春枕上

擇蔬翻餅鬧殘更兒女喧喧短夢驚  
想得春風連夜到東禪粥鼓忽分明



睡覺

尋思斷夢半普騰  
漸見天窓紙瓦明  
宿鳥噪羣穿竹去  
縣前猶自打殘更

石湖詩集卷二十九

石湖詩集卷三十

宋 范成大 撰

臘月村田樂府十首

并序

余歸石湖往來田家得歲暮十事採其語各賦一詩  
以識土風號村田樂府其一冬春行臘日春米為一  
歲計多聚杵臼盡臘中畢事藏之土瓦倉中經年不  
壞謂之冬春米其二燈市行風俗尤競上元一月前

已買燈謂之燈市價貴者數人聚博勝則得之喧盛不減燈市其三祭竈詞臘月二十四夜祀竈其說謂竈神翌日朝天白一歲事故前期禱之其四口數粥行二十五日煮赤豆作糜暮夜闔家同饗云能辟瘟氣雖遠出未歸者亦留貯口分至襁褓小兒及僮僕皆預故名口數粥豆粥本正月望日祭門故事流傳為此其五爆竹行此他郡所同而吳中特盛惡鬼蓋畏此聲古以歲朝而吳以二十五夜其六燒火盆行

爆竹之夕人家各又於門首燃薪滿盆無貧富皆爾  
謂之相暖熱其七照田蠶詞與燒火盆同日村落則  
以禿帚若麻蔗竹枝輩燃火炬縛長竿之杪以照田  
爛然徧野以祈絲穀其八分歲詞除夜祭其先竣事  
長幼聚飲祝頌而散謂之分歲其九賣癡獸詞分歲  
罷小兒繞街呼叫云賣汝癡賣汝獸世傳吳人多獸  
故兒輩諱之欲賈其餘益可笑其十打灰堆詞除夜  
將曉鷄且鳴婢獲持杖擊糞壤致詞以祈利市謂之

打灰堆此本彭蠡清洪君廟中如願故事惟吳下至  
今不廢云

冬春行

臘中儲蓄百事利第一先春年計米羣呼步碓滿門庭  
運杵成風雷動地篩勻箕健無糶糠百斛只費三日忙  
齊頭圓潔箭子長隔籬耀日雪生光土倉瓦龕分蓋藏  
不蠹不腐常新香去年薄收飯不足今年頓頓炊白玉  
春耕有種夏有糧接到明年秋刈熟鄰叟來觀還歎嗟

貧人一飽不可賒官租私債紛如麻有米冬春能幾家  
燈市行

吳臺今古繁華地偏愛元宵燈影戲春前臘後天好晴  
已向街頭作燈市疊玉千絲似鬼工剪羅萬眼人力窮  
兩品爭新最先出不待三五迎東風兒郎種麥荷鋤倦  
偷閒也向城中看酒壚博塞雜歌呼夜夜長如正月半  
災傷不及什之三歲寒民氣如春酣儂家亦幸荒田少  
始覺城中燈市好

祭竈詞

古傳臘月二十四竈君朝天欲言事雲車風馬小留連  
家有盃盤豐典祀豬頭爛熟雙魚鮮豆沙甘鬆粉餌圓  
男兒酌獻女兒避酌酒燒錢竈君喜婢子鬪爭君莫聞  
猫犬觸穢君莫嗔送君醉飽登天門杓長杓短勿復云  
乞取利市歸來分

口數粥行

家家臘月二十五浙米如珠和豆煮大杓轆鐺分口數



疫鬼聞香走無處  
鍤薑屑桂澆蔗糖滑甘無比勝黃梁  
全家團樂罷晚飯在遠行人亦留分  
祿中孩子強教嘗  
餘波徧沾獲與臧  
新元叶氣調玉燭天行已過來萬福  
物無疵癘年穀熟長向臘殘分豆粥

爆竹行

歲朝爆竹傳自昔  
吳儂政用前五日  
食殘豆粥掃罷塵  
截筒五尺煨以薪  
節間汗流火力透  
健僕取將仍疾走  
兒童却立避其鋒  
當堦擊地雷電吼  
一聲兩聲百鬼驚

三聲四聲鬼巢傾十聲百聲神道寧八方上下皆和平  
却拾焦頭疊牀底猶有餘威可驅癘屏除藥裏添酒杯  
晝日嬉遊夜濃睡

燒火盆行

春前五日初更後排門然火如晴晝大家薪乾勝豆蔞  
小家帶葉燒生柴青煙滿城天半白棲鳥驚啼飛格磔  
兒孫圍坐犬鷄忙鄰曲歡笑遙相望黃宮氣應纔兩月  
歲陰猶驕風栗烈將迎陽艷作好春政要火盆生煖熱

照田蠶行

鄉村臘月二十五長竿然炬照南畝  
近似雲開森列星  
遠如風起飄流螢  
今春雨雹繭絲少  
秋日雷鳴稻堆小  
儂家今夜火最明的  
知新歲田蠶好  
夜闌風焰西復東  
此占最吉餘難同  
不惟桑賤穀芄芄  
仍更苧麻無節菜  
無蟲

分歲詞

質明奉祠今古同  
吳儂用昏蓋土風  
禮成廢徹夜未艾

飲福之餘即分歲地爐火輒蒼朮香飴盤果餌如蜂房  
就中脆餠專節物四座齒頰鏘冰霜小兒但喜新年至  
頭角長成添意氣老翁把盃心茫然增年翻是減吾年  
荆釵勸酒仍祝願但願尊前且強健君看今歲舊交親  
大有人無此盃分老翁飲罷笑捋鬚明朝重來醉屠蘓

賣癡獸詞

除夕更闌人不睡厭禳鈍滯迎新歲小兒呼叫走長街  
云有癡獸召人買二物於人誰獨無就中吳儂仍有餘

巷南巷北賣不得相逢大笑相挪揄  
標翁塊坐重簾下  
獨要買添令問價兒云翁買不須錢  
奉賒癡歎千百年

打灰堆詞

除夜將闌曉星爛糞埽堆頭打如願  
杖敲灰起飛撲籬  
不嫌灰浣新節衣老媪當前再三祝  
只要我家長富足  
輕舟作商重船歸大牒引犢鷄哺兒  
野蘭可縑麥兩岐  
短袖換著長衫衣當年婢子挽不住  
有耳猶能聞我語  
但如我願不汝呼一任汝歸彭蠡湖

自嘲二絕

終日曉曉漫說空觸來依舊與爭鋒  
登時覺悟忙收拾  
已是闍黎飯後鐘

惡聲惡色橫相干  
靚面須臾萬箭攢  
有客癡聾都不動  
方知我被見聞瞞

海棠欲開雨作

春睡花枝醉夢回  
安排銀燭照粧臺  
蒼茫不解東風意  
政用此時吹雨來

雨再作政妨海棠

漂紅濕紫滿莓苔  
滌墨濃雲尚送雷  
風雨豈無他日再  
何須隨却海棠來

蠻觸

蠻觸紛拏室未虛  
心知懲忿欠工夫  
腹須空洞方容物  
事過清涼已喪吾  
萬仞吾山高不極  
一團心火蔓難圖  
從今立示寒灰觀  
笑看蒼黃走鄭巫

偶然

偶然寸木壓岑樓且放渠儂出一頭鯨漫橫江無奈螳  
鵬雖運海不如鳩躬當自厚人何責世已相違我莫求  
石火光中爭底事寬顏收拾付東流

曉泊橫塘

短夢難成却易驚披衣起漱玉池清遙知中夜南風轉  
洶洶前村草市聲

次韻袁起巖瑞麥此麥兩歧已黃熟其間又出一  
青枝亦已秀實傳記所未載也



民和神福固其宜况有仁先四者施吳稻即看收再熟  
周年先已秀雙歧蕙風半老黃金穗梅雨重春綠玉枝  
樂不可支聊發詠田間日日是芳時

次韻袁起巖甘雨即日應祈

天遣賢侯惠此州隨車一雨緩千憂藥寮坐看雲穿屋  
蓮棹歸將葉蓋頭三伏涼來那易得百年飽外更何求  
合詞但祝為霖手早侍薰絃十二旒

劉德修少卿避暑惠山因便寄贈

鳴鳳朝陽尺五天忽忽忽過白鷗邊  
遙憐海內無雙士  
獨酌人間第二泉  
決去君今身似葉  
贈行誰有筆如椽  
老夫但祝重相見  
未擬消魂賦黯然

幽棲

幽棲先自嬾衣裳  
秋暑薰肌汗似漿  
對客緒言多勉強  
謀家生事總荒唐  
蚤眠不待星當戶  
晚飯常占日半牆  
莫道閒中無外慕  
朝朝屈指望新涼

園林

園林隨分有清涼走徧人間夢幾場鐵硯磨成雙鬢雪  
桑弧射得一繩牀光陰畫紙為碁局事業看題檢藥囊  
受用切身如此爾莫於身外更乾忙

七月十八日濃霧作雨不成

曉霧障朝暉日脚戰未透儻然成一雨亦足洗塵替江  
南富秋暑老穉呻永晝田間翻畏涼能糝嘉穀秀昨朝  
東有虹光彩照高柳占云天掠剩政恐耗升斗陽光趣  
堅實乘除或相掾臞儒雖病暘且復忍汗垢

吳人謂立  
秋後虹為

天收雖大稔  
亦減分數

戲贈勤長老

從君揮麈演金乘我已無心纏葛藤第一圓通三鼓夢  
大千世界一窓燈罷參相子庭前意權作梅花樹下僧  
飯飽間行復間坐人間有味是無能

次韻袁起巖送示郡治雙蓮圖

珠淵玉水折方員湧出雙蓮照酒邊壓倒小湖三級草  
增光後沼兩重蓮茗華名字元相並桃葉根株本自連

好把吳歎翻楚些楊荷新曲勝當年

洞庭小湖寺舊得瑞象有草繞之投

草湖中生三級紅蓮皮日休有木蘭後池重臺蓮詩云兩重元是一重心皆吳中瑞故事而未有雙蓮之傳也

次王正之提刑韻謝袁起巖知府送茉莉二檻

千里移根自海隅風颿破浪走天吳散花忽到毘耶室  
似欲橫機試病夫

燕寢香中暑氣清更煩雲鬢插瓊英明妝暗麝俱傾國  
莫與磬仙品弟兄

再賦茉莉二絕

薰蒸沉水意微茫  
全樹飛來爛熳香  
休向寒鴉看日景  
祇今飛燕侍昭陽

憶曾把酒泛湘灘  
茉莉毬邊擘荔枝  
一笑相逢雙玉樹  
花香如夢鬢如絲

再賦郡治雙蓮三絕

館娃魂散碧雲沉  
化作雙葩寄恨深  
千載不償連理願  
一枝空有合歡心

池光闌檻倚斜暉  
把酒看花醉不歸  
但許鴛鴦相對浴

休驚翡翠一雙飛

兩歧秀罷已蒿萊  
春意還從菡萏回  
不是使君和氣勝  
此花應向別人開

范村午坐

好風入修篁  
槁葉舞而墮  
斷續一蛩吟  
高下雙蝶過  
凍樾午陰圓  
靜極成癡坐  
老便几杖供  
慵廢誦弦課  
蒲團  
輒易煖  
困來百骸惰  
四傍無人聲  
誰驚短夢破

石湖詩集卷三十



石湖詩集卷三十一

宋 范成大 撰

讀白傅洛中老病後詩戲書

樂天號達道晚境猶作惡陶寫賴歌酒意象頗沉著謂  
言老將至不飲何時樂未能忘煖熱要是怕冷落我老  
乃多戒頗似僧律縛閒心灰不然壯氣鼓難作豈惟背  
聲塵亦自屏杯酌日課數行書生經一囊藥若使白公

見應譏太蕭索當否竟如何我友試商畧

秋夕不能佳眠

晝坐既摧頽夜卧亦展轉檢校百骸間無一得安穩四  
大元假合解散會歸盡何煩造化兒前期若相窘咄咄  
方書空忽發一笑輒都緣有我相浪把此身認於中有  
安否隨即生喜愠蟬聲耳根響蠅翅目中暈無明徧大  
千祇自植愁本化兒安在哉作詩謝不敏

王正之提刑見和末利小詩甚工今日末利漸過

木犀正開復用韻奉呈二絕

南花宜夏不禁涼，猶繞珍叢覓舊香。  
留得典刑傳菊圃，

別筵新酒待重陽。

吳中有木利菊花

未利吟餘又木犀，碧瑤葉底露金支。  
從今日日須搜句，莫遣硯池生網絲。

復用韻記昨日坐中劇談及趙家琵琶之妙呈王  
正之提刑二絕

病來六結總龜藏，不用濃薰戒定香。  
花下酒邊非我事，

但餘消瘦是東陽

曹穆新聲和者稀如今妙手屬天支轉關渡索都傳得

想見飛凰舞綠絲

正之云轉關六么渡索梁州歷統薄媚醉吟商胡渭州此四曲承平時專

入琵琶今不復有能傳者余按北夢瑣言載黯南節度王保義女善彈琵琶夢吳人授曲內有醉吟商一調其來遠笑

再題白傅詩

香山歲晚惜芳辰索酒尋花一笑欣列子御風猶有待  
鄒生吹律強生春若將外物關舒慘直恐中塗混主賓

此老故應深解此逢場聊戲眼前人

石湖中秋二十韻十二年前嘗與工部兄及賓客  
為此遊今有隔世者感今懷舊而作

野外行吾意城中寄却愁  
半秋正夜月千古五湖舟  
湧地金芒發行天玉鏡  
流珠星沉不現銀  
漠黯如收高浪連三境  
長風近十洲水天雙對鏡  
身世一浮漚迴白包元氣  
空明熨病眸只憐心浩蕩  
不管鬢颼颼放棹真狂矣  
關門有此不四并非易事  
一笑亦難謀急管參漁笛

清歌間棹謳逢迎成解后嘯咏勸綢繆女擷蘋花獻妻  
傾竹葉酬今宵如不飲何處可忘憂憶昔誰同賞于今  
歲恰周陟岡睽魯衛伐木愴應劉獨歎靈光在能追汗  
漫遊大都緣未盡豈是病都瘳縱意塞蓬席輕生倚柁  
樓節宣誠小爽猶勝賦悲秋

中秋後兩日自上沙回聞千巖觀下巖桂盛開復  
棧石湖留賞一日賦兩絕

金粟枝頭一夜開故應全得小詩催籃輿緩緩隨兒女

引入天香洞裏來

千巖觀下碧瑤林  
歲晚青青共此心  
隱士歸兮花未老  
每年來把一杯深

有會而作

拙是天資嬾是真  
本來何用戒香薰  
強陽氣盡冥恩怨  
杜德機深泯見聞  
念動即時漂鬼國  
心空隨處走魔軍  
室中已自空諸有  
休負天機與地文

戲題無常鐘二絕

著衫脫袴兩浮休切莫隨渠認路頭三尺蒲牢關底事  
尋聲接響大悠悠

合成四大散成空草木經春便有冬生滅去來相對代  
為君題作有常鐘

自箴

有對易成吟域無情那有從違癡人妄認逆境平地自  
生鐵圍

白傅病猶牽愛晁公老未斷嗔莫問是情是性但參無



我無人

俗物汨陳大好家奴倒迂何誅泡幻初無典要光陰況  
已桑榆

題畢少董繡經圖

絳帳飛沙暗青編古意深誰知洛下詠中有越人吟

次韻袁起巖喜雨

使君精禱動仙靈月御俄從畢嚼經昨夜雲頭垂皂蓋  
今朝雨脚挂青冥池光拍岸浮州宅湖面粘天漲洞庭

賸采吳歛歌歲事傳歸擊壤調中聽

昨議復池光亭  
額故因及之

再次喜雨詩韻以表隨車之應

仙篆驅龍效水靈佛螺吹梵演雲經何煩礎汗生蒸潤  
便借爐薰作晦冥一念故應周法界萬神元不隔明庭  
曷時圭壁形聲應不似周詩莫我聽

三次喜雨詩韻少伸嘉頌

嚮非賢牧政通靈幾負松陵耒耜經天籟侵晨占少女  
雨師連夜檄元冥作霖豈必求商野召見誰能右漢庭

聞有追鋒傳好語從今側耳為君聽

府公錄示和提幹喜雨之作輒次元韻

雨挾潮痕漲具區流渠決決繞幽居荷鋤日課都忘倦  
抱甕天機本不疎且喜水平昌谷稻莫教雷假介休車  
老翁飽外還多事更把林間種樹書

雨後田舍書事再用前韻

村村畦圃藝新區處處田廬葺舊居熟透晚梅紅的皜  
展開新穉翠扶疎向來矜寡猶遺秉此去汙邪又滿車

誰解續經如魯史為將連歲有年書

放下菴即事三絕

無風香篆吐長絲書架凝塵不下帷  
鳥雀聲和晴日暖  
午窓捫蝨坐多時

病後天魔不戰降夢中千頃白鷗江  
心空境寂聲塵盡  
却愛秋蠅撲紙窓

閉門幽僻斷經過靜極兼無雀可羅  
林下故人知幾箇  
就中老子得閒多

寄題西湖并送淨慈顯老三絕

南北高峰舊往還  
芒鞋踏徧兩山間  
近來却被官身累  
三過西湖不見山

膏肓泉石痼煙霞  
半世遊山不著家  
老入蒲團三昧定  
坐看穿膝長蘆芽

中秋月了又黃花  
卯後新醅午後茶  
別沒工夫譚不二  
文殊休更問毘耶

題藥簾

合成四大本非真便有千般病染身地水火風都散後  
不知染病是何人

淨慈顯老為衆行化且示近所寫真戲題五絕就  
作畫贊

孤雲野鶴本無求剛被差充粥飯頭擔負一簋牙齒債  
鐘鳴鼓響幾時休

冒雪敲冰乞米迴齋堂如海鉢單開衆中若有知恩者  
一粒何曾齧破來

千里驅馳出為人  
顏容消瘦老於真  
食輪轉後無餘事  
莫學諸方轉法輪

何時平地起浮圖  
化得冬糧但付厨  
推倒禪牀并拄杖  
飢來喫飯看西湖

殿中泥佛已丹青  
堂上禪師也畫成  
笑我形骸枯木樣  
無禪無佛太羸生

老態

浮生自有老規模  
寒煥隨宜不用拘  
未盡九秋先挾纊

猶賒十月已開爐一心定後冥欣厭四大安時適慘舒  
若使強追年少樂直成赤手縛於菟

憶昔

鉛刀曾齒莫邪銛遊倦歸歟雪滿髯柳帶受風元不結  
荷盤承露竟無黏逢場鼓笛如灰冷送老葢鹽似蜜甜  
留得本來真面目行藏何假問龜占

梅林先生夫人徐氏挽詞二首

擇對鳴珂里宜家駟馬門肅雍成孝敬燕喜助平反閱



世彌三壽還鄉忽九原松風搖草露愁絕後堂萱  
昔造鯉庭後嘗瞻林下風一從隨地遠五度閱星終教  
載恩勤在驚呼夢幻空送車知幾兩獨欠舊孤童

胡長文給事挽詞三首

結綬參高妙垂紳侍邃清紫荷青瑣闥玉帳錦官城行  
矣超龜列終然鬱驥程寂寥經濟事遺恨入銘旌

許國心如日還家鬢未星四并供燕喜萬事付櫻寧東  
牖樽猶湛南園醉不醒淒涼招隱路苔蝕履綦青

姻館交情厚官聯事契長鳴珂朝並轡秉燭夜傳觴何  
意塘蒲晚翻哦露薤章羸軀如可強慟哭踞湖岡

次韻王正之提刑大卿病中見寄之韻正之得請  
歸四明并以餞行

名卿緒前輩風格如玉山累累培塿中見此高孱顏攬  
轡忽思歸無人解糜賢飄飆駕紫車浮雲眎朱丹向來  
小病惱體力今已安胡為犯風雪江湖行路難呼酒煖  
征衫寧計斗十千倡酬悔不數長懷悲短緣離合固常

事忽忙增惘然浩蕩海山春登臨想臞仙笑我守荒徑  
老繭深裏纏擬題憶鄞句思咽冰下泉遲公寄新作使  
我頭風痊

戲題趙從善兩畫軸三首

王正之云從善家有琵琶妓甚工病翁未得見

借此畫以戲之

一枝香杏一枝梅各占東風挂玉釵居士石腸都似夢  
王孫心眼怎安排

無笑無言兩斷魂一杯誰為煖霜寒情知別有真真在

試與千呼萬喚看

搔頭珠重步微搖約臂金寒束未牢要見低鬟揜玉腕  
更須斜抱紫檀槽

枕上六言二首

寒更寂歷向曉短夢參差屢驚鷄鳴似喚我醒犬吠知  
有人行

獨眠被出圭角晏起帳承隙光一老綢繆牖戶幾人顛  
倒衣裳

喜收知舊書復畏答書二絕

故人寥落似晨星  
珍重書來問死生  
筆意不如當日健  
鬢邊應也雪千莖

強裁尺素答相思  
兩目眵昏腕力疲  
牽率老夫今至此  
門前猶說報書遲

簡畢叔滋覓牡丹

冷落韶光穀雨寒  
一年孤負倚闌干  
欲知春色偏濃處

須向香風逕裡看

畢園花逕  
名香風

再賦簡養正

南北梅枝噤雪寒  
玉梨皴雨淚闌干  
一年春色摧殘盡  
更覓姚黃魏紫看

石湖詩集卷三十一

謹案卷二十八第四頁後六行連年薄熟甌生塵  
刊本熟訛熟據黃昌衢本改

第七頁前一行戴笠冒風霜刊本戴訛刀據黃昌  
衢本改

第八頁前二行歸去簞瓢拄杖藜刊本簞訛丹據  
黃昌衢本改

第十頁後四行亢宗雖愧鎮西子刊本西訛公據  
黃昌衢本改

第十一頁後八行得壽協虞皇刊本虞訛虛今改  
第十二頁前六行蜀人咸佑天恩厚刊本咸佑訛  
減估據黃昌衢本改

第十三頁前八行不知通欠萬新收刊本欠訛失  
據黃昌衢本改

卷二十九第三頁後七行卧病且登江上臺刊本  
且訛豈據黃昌衢本改

卷三十一第五頁前七行昨夜雲頭垂皂蓋刊本



垂訛隨今改

第五頁後五行不似周詩莫我聽刊本詩訛時案  
此用詩雲漢篇寧莫我聽語今據改正





總校官庶吉士 臣侍朝

校對官編修 臣楊壽楠

謄錄監生 臣王泰雲

欽定四庫全書薈要

集部

石湖詩集卷三十四

二至

詳校官助教臣謝登雋



石湖詩集卷三十二

宋 范成大 撰

春日覽鏡有感

習氣不解老壯心故嗟峨忽與鄉曲齒方驚年許多有  
眼不自見尚謂朱顏酖今朝鏡中逢憔悴如枯荷形骸  
既遷變歲華復蹉跎悟此吁已晚既悟當若何烏兔兩  
惡劇不滿一笑呵但淬割愁劍何須揮日戈兒童競佳

節呼喚儻且歌我亦興不淺健起相婆婆

故太夫人章氏挽詞二首

朱子儀總領之母

洵美相門裔有齊邦媛賢藻蘋南澗下萱竹北堂前孝  
敬三從謹哀榮五福全松門諸健筆題作晉陵阡

積慶今如許生兒得寧馨軻親躬授教韋子世傳經壽  
暈明卿月安輿拱使星市橋何處在夢斷一溪青

舅母太夫人方氏挽詞三首

四德儀邦族三遷式里門姑寧不疾痛子自樂平反夏

枕方供扇薰堂甫種萱那知秋暑退無復御輕軒  
門戶傳清白階庭侍紫青百年歌燕喜五福用康寧訣  
錄嘗觀妙旒旌謾勒銘神遊定超絕何必評泉局  
我願延陵道幾如渭水陽適傳杯泛影何意隙沉光擬  
補蘭陔雅翻吟薤露章支離妨執紼雨泣望楸行

壽櫟堂前小山峰凌霄花盛開葱蒨如畫因名之

曰凌霄峰

天風搖曳寶花垂花下仙人住翠微一夜新枝香倍煖

旋薰金縷綠羅衣

山容花意各翔空題作凌霄第一峰門外輪蹄塵撲地  
呼來借與一枝筇

代兒童作立春貼門詩三首

剪綵宜春勝泥金祝壽幡雪梅同雪鬢相對兩凌寒  
綠野添花逕青春引杖藜家人行樂處雙勸玉東西  
盛族推山長修齡號櫟翁屏花春不老日日是東風

代兒童作端午貼門詩三首



畫閣圍香裏明窓宴坐中  
兵符不須篆丹轉藥爐紅  
管領神仙侶追陪山長家  
往來惟意適歌舞對年華  
黍筒小費名田課昌歌多  
浮樂聖杯笑倩艾人看戶  
外北窓深處詠歸來

重陽不見菊二絕

節物今年事事遲  
小春全未到東籬  
可憐短髮空欹帽  
欠了黃花一兩枝

冷蕊蕭疎蝶懶飛  
商量何日是花時  
重陽過後開無害

只恐先生不賦詩

古風送南卿

廬阜有佳人顏色皦冰玉不能時世粧蕭然古冠服紛  
紜倚市門組麗眩紅綠妖歌促艷舞飛上黃金屋安知  
乘鸞侶流落墮空谷風泉入環珮月露作膏馥梁肉豈  
不珍淪雪煮黃獨聊用慰朝飢歲寒膚起粟綺叢三尺  
塵無路到松竹誰能撫孤桐為奏招隱曲

偶至東堂

岸幘蕭騷雪滿簪一閒真是直千金歸來果里多情話  
病後香山少醉吟久坐蒲團蕉葉放閒拖藜杖蘚花深  
飢時啣飯慵時睡何暇將心更覓心

李郎中挽詞二首

聖俞

劇郡思賢牧名曹失望郎六參能幾日兩鬢未全霜雪  
水新阡遠桐川舊隱荒絕憐垂白母淚血獨還鄉  
憶昔單車使惟君勇輔行馬蹟招共載羝乳約同盟老  
去長懷舊悲來遽隔生故人凋落盡衰涕不勝橫

謝江東漕楊廷秀祕監送江東集并索近詩一首  
遠道悠悠日暮雲愁眉今日為君軒殘燈獨照江東集  
短夢相尋白下門即事想多梅蕊句有誰堪共桂花樽  
斯文賴有斯人在會合何時得細論

秃翁衰雪涕垂頤彷彿三生懶散師決隨淪膚都是病  
傾困倒廩更無詩笑看筆格網絲編閒數憲樵花影移  
事業光陰今若此故人休說舊襟期

霜後紀園中草木十二絕

菊花芙蓉退化工少均逸蚤晚梅花動從此無間日

遮藏茉莉檻纏裏芭蕉身我亦入室處忍寒待陽春  
製艾亦不急緼袍堪禦冬從渠抱枝槁撼撼鳴霜風  
種葵如種麥隔歲已下子僅成一榦花浪備四時氣  
棠梨芳意多頗惜歲晚晚殷勤小春花特地慰愁眼  
牡丹初翦時已具新花眼代謝不容髮笑殺鐵門限  
客從揚州來遺我揚州花筠籠貯枯柅明年擅春華  
風倒醪醕架長條頭搶地趁渠未萌芽政可相料理

清霜染柿葉荒園有佳趣留連伴歲晚莫作流紅去  
真珠綴玉船梧子炒可供莫嫌能墮髮老夫頭已童  
桃能驅不祥霜後葉鋪地抱枝崑崙奴猶解禦魑魅  
門冬如僕隸長年護堦除生兒乃不凡磊落玻璃珠  
以狨坐覆蒲龕中

蠹蝕塵昏度幾年蒙茸依舊輭如綿且來助煖烏皮几  
莫憶衝寒紫繡韜

再到虎丘

不過溪橋又兩年偶隨筇竹訪幽禪有緣再踏雲巖路  
無處重尋石井泉擬輟半山分座住先攜一枕借牀眠  
覺來飽啣紅蓮飯正是塘東稻熟天

虎丘石井在張又新東南水品第三

今寺僧不能名其處妄指寺中一土井當之經藏後有大方井舊名觀音井上有石柱為挂轆轤之處疑此是古石井今井已湮塞百年柱亦徙他用累諷住山者多邈然今以語僻老

### 虎丘六絕句

#### 點頭石

當年揮麈講何經賺得堅頑側耳聽我自吟詩無法說

石頭莫作定盤星

千人坐

聽經人散薛花深  
千古誰能更賞音  
只好岸中披鶴氅  
風清月白坐彈琴

白蓮池

碧泓白石偃樛枝  
愛水嫌風老更低  
潭影中間龍影卧  
一山好處沒人題

劍池



石罅泓渟劍氣潛誰將樓閣苦莊嚴只知煖熱遊人眼  
不道蒼藤翠木嫌

致爽閣

碧嶂橫陳似斷鼇畫闌相對兩雄豪東軒只有雲千頃  
不似西山爽氣高

方丈南窓

鼓板鐘魚徹曉喧誰云方外事蕭然窓間日暮寒煙重  
未到齋時我正眠

雪寒圍爐小集

席簾紙閣護香濃說有談空愛燭紅高釘羶根澆杏酪  
旋融雪汁煮松風康年氣象冬三白浮世功名酒一中  
無事閉門渠易得何人躡屐響牆東

白玉樓步虛詞六首

并序

趙從善示余玉樓圖其前玉階一道橫跨綠霄中琪  
樹垂珠網夾階兩傍綠霄之外周以玉闌闌外方是  
碧落階所接亦玉池中間湧起玉樓三重千門萬戶

無非連璐重壁屋覆金瓦屋山綴紅牙垂璫四簷黃  
簾皆捲樓中帝座依約可望紅雲自東來雲中虛皇  
乘玉輅駕兩金龍侍衛可見者靈官法服騎而夾侍  
二人力士黃麾前導二人儀劍四人金圍子四人夾  
輅黃幡二人五色戟帶二人珠幢二人金龍旗四人  
負納陛而後從二人雲頭下垂將至玉階樓前仙官  
冠披出迎方下階雙舞鶴行前雲駕之傍又有紅雲  
二其一仙官立幢節間其二女樂並奏玉樓之後又

有小玉樓六其制如前寶光祥雲前後蔽虧或隱或現小案之前獨為金地亦有仙官自金地下迎傍小樓最高處有飛橋直瑤臺仙人度橋登臺以望名數可紀者大畧如此若其景趣高妙碧落浮黎青冥風露之境則覽者可以神會不能述於筆端此畫運思超絕必夢遊帝所者髣髴得之非世間俗史意匠可到明窓淨几畫卷展玩恍然便覺身在九霄三景之上奇事不可以不識簡齋有水府法駕導引歌詞乃

倚其體作步虛詞六章以遺從善羽人有不俗者使  
歌之於清風明月之下雖未得仙亦足以豪矣

琳霄境却似化人宮梵氣彌羅融萬象玉樓十二倚清  
空一片寶光中

浮黎路依約太微間雪色寶階千萬丈人間遙作白虹  
看幢節度高寒

罡風起背負玉虛廷九素煙中寒一色扶闌四面是青  
冥環拱萬珠星

流鈴響龍馭籟雲來夾道騫華籠綵仗紅雲扶輅輦天  
街迎駕鶴毳毳

鈞天奏流韻滿空明琪樹玲瓏珠網碎仙風吹作步虛  
聲相和八鸞鳴

樓閣外輦道插非煙間上鬱蕭臺上看空歌來自始青  
天揚袂揖飛仙

送趙從善少卿將漕淮東

玉筍風標右漢廷起家聊直使車星古來將相多頭黑

此去功名尚鬢青披草兩年南北巷折梅明日短長亭  
門前車轍從今少寂寞柴荆且暫扃

范村雪後

習氣猶餘燼鍾情未濕灰忍寒貪看雪諱老強尋梅  
貼愁眉展勾般笑口開直疑身健在時有句飛來

寒夜觀雪

靜極孤鴻響寒疑萬籟暗眼花燈下字髭斷雪中吟頗  
似償前債非關惜寸陰可憐蝴蝶夢翻作蠹書蟬

瓶花二首

水仙攜蠟梅來作散花  
雨但驚醉夢醒不辨香來處  
小梅未可折不折惜空回  
擁鼻撚一枝也道探春來

瑞香三首

小檻移秀色端來媚禪房  
道人不解飲醺然醉天香  
紫雲盛繡被團欒覆衣篝  
濃薰百和韵香極却成愁  
一叢三百朵細細拆濃檀  
簾幕護花氣不知窓外寒

石湖詩集卷三十二



石湖詩集卷三十三

宋 范成大 撰

塵居久不見山或勸作小樓以助登覽又力不能  
辦今年益衰此興亦闌矣

結廬占城市初豈卜云吉謁醫并治庖二事便衰疾乘  
除徐自笑翻覺此計失經年不見山無異處暗室平生  
瘼煙霞歲晚成俗物安得百尺樓屋上高突兀列岫擁

青來爽氣助佔嗔嘗試與匠謀工費蝟毛出俸餘強弩  
末家事空囊澀經營十年餘高興竟蕭瑟人生不如意  
十事常六七身今況遲暮長算屈短日縱成此段奇髮  
白何由漆且學商山翁彎跼跼蟄霜橋

愛雪歌

平生愛雪如子猷江湖乘興常泛舟長篙斲冰陰火迸  
玉板破碎凝不流淙瑤大響出船底兩舷戛擊鏘鳴球  
棹夫披蓑舞白鳳灘子挽絳拖素虬四開篷窻愛清供

風卷花絮飛來稠飄飄著衣寶唾住片片入酒春酥浮  
醉中榜入玉煙去耳熱不管寒颼颼大千空濛到何許  
日暮未肯回船頭夜深凍合隨處泊歌呼達曉魚龍愁  
明朝掬雪頰且漱揮毫落紙雲煙適新詩往往成故事  
至今句法留滄州推遷華年絃柱換俛仰歸鬢塘蒲秋  
曉衾聞雪亦健起徑欲一棹追昔遊羶衫臍肚束渾脫  
絮帽匝匝蒙兜鍪十步出門九步坐兒女遮說相苛留  
謂言此是少年事歲晚牖戶當綢繆萬景無窮鼎鼎至

百年有限垂垂休夢隨落鴈墮沙背愁對飢鴟蹲瓦溝  
重尋勝蹟可復許且挹清寒指病眸須臾未遽妨性命  
呼童盡捲風簾鉤

牆外賣藥者九年無一日不過吟唱之聲甚適雪  
中呼問之家有十口一日不出即飢寒矣

十口啼號責望深寧容安穩坐擅針長鳴大咤欺風雪  
不是甘心是苦心

大雪送炭與芥隱

無因同撥地爐灰想見柴荆晚未開不是雪中須送炭  
聊裛風景要詩來

雪後苦寒

旋融簷滴凍琅玕風力如刀刮面寒雪陣攪空風却軟  
天公知我倚闌干

新歲書懷

門閭知閒好窓晴與睡宜歲華書戶筆年例探梅詩省  
長棊三著量添飯兩匙豁除身外事未是苦衰遲

次韻養正元日六言

歲踰耳順俄七年去古稀只三從今蓮葉巢穩誰在槐  
柯戰酣臍下丹田休想口邊白醖罷參渴飲飢餐困睡  
是名真學瞿聃養正詩云流年五十踰二明日半百過  
三上魏文帝語下樂天語養正今年五

十三此句甚工余今年六  
十七亦自撰三字韻二句

次韻姜堯章雪中見贈

玉龍陣長空臯比忽先犯鱗甲塞天飛戟逐三百萬當  
時訪戴舟却訪一寒范新詩如美人蓬華愧三桀

次韻徐提舉游石湖三絕

三徑荒蕪岫幌開  
錦車何事肯徘徊  
春風想為高人住  
落絮殘花好在哉

日脚烘晴已破煙  
山頭雲氣尚披綿  
却須多謝朝來雨  
洗淨明湖鏡裏天

天上麒麟翰墨林  
當家手筆擅文心  
欲知萬頃陂中意  
但向三篇句裏尋

閏月四日石湖衆芳爛漫

北垞南岡總是家兒童隨逐任驩譁開嘗臘尾蒸來酒  
點數春頭接過花盡把園林蒙錦繡多添門戶鎖煙霞  
杖藜想被東風笑扶却衰翁管物華

檢校石湖新田

今朝南野試開荒分手耘鋤草棘場下地若干全種秫  
高原無幾謾栽桑蘆芽碧處重增岸梅子黃時早濬塘  
田里只知溫飽事從今拚却半年忙

致政孫從政挽詞



丈室推居士安車稱老夫回骸柔下餓續命轍中枯重  
道幾三叟輕財似八廚欲知潛德報青紫付遺孤

寄題林景思雪巢六言三首

大地九冰徹底小巢四壁俱空只有梅花同調雪中無  
限春風

何處溫泉火井誰家熊席狐裘堂燕幾番炎熱冰蠶一  
繭綢繆

萬境人蹤盡絕百圍天籟都沉惟餘冷淡生活時復撚

鬣凍吟

枕上二絕效楊廷秀

藤枕頻移觸畫屏無膠滋味厭殘更寒難且道貪眠著  
窓紙如何不肯明

枕前百念忽紛然舊學新聞總現前現到天明無可現  
依前還我日高眠

送文處厚歸蜀類試

萬里東來萬里歸正憐寡婦與孤兒死生契闊心如鐵

風雨飄搖鬢欲絲，早集漢庭陪振鷺。莫留岷嶺戀蹲鴟，  
故家零落今餘幾。門戶非君更屬誰。

處厚族弟季高客死成都制置使京

仲遠諉送其家扶護還吳慨然遠來忘其勞費

### 重送文處厚因寄蜀父老三首

江上連檣疊鼓行，不爭微利即爭名。算來無似君瀟灑，  
來往空船載月明。

下峽東歸十五年，因君話舊意茫然。煩將遠道悠悠夢，  
直到天西暑雪邊。

灌口江源不斷流域眉山月幾番秋江山好處吾能記  
為問江山記客不

虎丘新復古石井泉太守沈虞卿舍人勸農過之  
為賦三絕謹次韻

勸耕堂上醉高年和氣春風共藹然大士亦修隨喜供  
夜來古井躍新泉

落紙雲煙墮翠巒一泓潭月關清寒鳳凰池上揮毫手  
却掬山泉淬筆端

傳聞公作新亭好先報儂家拄杖知便擬挈瓶來煮茗  
繞闌干角徧尋詩

連夕大風凌寒梅已零落殆盡三絕

枝南枝北玉初勻夜半顛風捲作塵春夢都無三日好  
一冬忙殺探梅人

玉雪飄零賤似泥惜花還記賞花時賞花不許輕攀折  
只許家人戴一枝

花開長恐賞花遲花落何曾報我知人自多情春不管

強顏猶作送春詩

唐懿仲諸公見過小飲凌寒殘梅之下二絕

春風動是隔年期更對殘花把一卮  
少待和煙和月看依稀猶似半開時

問人何處是花蹊香玉勻鋪不見泥  
莫怪山翁行步澀更無空處著枯藜

雲露堂前杏花

蠟紅枝上粉紅雲日麗煙濃看不真  
浩蕩光風無畔岸

如何鎖得杏園春

夢覺作

年增血氣減藥密飲食稀氣象不堪說頭顱從可知忽  
作少年夢嬌癡逐兒嬉覺來一惘然形骸乃爾衰夢中  
觀何見只似三歲時方悟夢良是却疑覺為非

次韻陳融甫支鹽年家見贈二首

范村如荒村一老雪垂領高軒欵門來驚破雀羅靜披  
草出迎客玉筍森秀整短章雖寂莫染指已嘗鼎歸驂

不可駐晨昏思定省

乃翁一經傳播獲了家事短檠寓真樂尺璧豈良貴年  
家有寧馨令我喜無寐加鞭翰墨場一躍羣空冀

聞石湖海棠盛開亟攜家過之三絕

東風花信十分開細意留連待我來開過十分風不動  
更無一片點蒼苔

家人扶上錦城頭蜂蝶團中爛漫遊報答春光須小醉  
紅雲洞裏按伊州



低花妨帽小攜筇深淺臙脂一萬重不用高燒銀燭照  
煖雲烘日正春濃

寄題毛君先生蓮華峰菴

天台一萬八千丈蓮華峰在諸峰上峰前結屋屋打頭  
獨有幽人自來往湖海雲遊二十春歸來還作住菴人  
漫山苦費食不盡繞屋長松為四鄰丹訣三千滿雲笈  
往來且喜無交涉清晨石上一爐香此時天地皆訢合  
我衰無力供樵蕪尚能相伴煖團蒲但願瘦筇緣未斷

會把蓮峰分一半

卷三十三

石湖詩集卷三十三

石湖詩集卷三十四

宋 范成大 撰

附賦

館娃宮賦 并序

靈巖山寺故吳館娃宮也山上下間臺別館之迹鬢  
髻可攷余少長遊焉感遺事而賦之

洵西山之南奔勢鬱律其巉空若大敵之在前忽踞虎

而跼龍半紫崖而砥平訪館娃之故宮是為逸王之舊  
遊有墟國之遺恫焉嗟乎汰哉復賢胥之忠告異陰詔  
之詖說暗養虎之後患縱處女使免脫迨嘗膽之謀成  
駭疽囊之潰裂蓋自有以賈禍非天為之作孽方其銜哀  
茹痛拄淚飲血儼拂士於前庭剋三年而報越訖甘心  
而一快夫何初志之英發及其見棲於姑蘇遽雌伏而  
大壞援宿恩而乞憐或赦圖於臣罪當是之時又何其  
憊也肆禍福之無門曷今愚而昨賢後千載之嗤點莫

不鍾咎於嬋娟固尤物之移人抑猶有可得而言蓋嘗  
觀於若人矣好大而欲速厭常而棄舊徂會稽之得意  
謂周鼎其唾手闖齊楚以朶頤睨陳蔡而驤首道甚遠  
而疾驅氣已餒而猶鬪外未寧而內憂東略之而西否  
阻關河以頓兵撤牆屋而致寇亟歸視其四封茂一夫  
之能守是猶螳螂之慕蟬不知黃雀之議其後也然以  
蕞爾之旅衡行四方攻靡堅郛戰無距行事便時利如  
徑乎無人之鄉惜也未聞大道宜其逸樂而志荒次有

臺池宿有嬪嬙左攜修明右撫夷光桀二八以前列咸  
絕世而浩倡嗟浣紗之彼姝乃獨繫於興亡蕩龍舟之  
水嬉擷香徑之春芳載夕陽以俱還秉遊燭於夜長灑  
金鍾之千石做酒池於舊商歌吳歛而楚舞薦萬壽於  
君王悵星河之易翻嘉來日之未央錚銅壺之鳴悲爛  
急烽之森芒慘梧宮之生愁踐桐夢之不祥歛高陵與  
深谷委盛麗於蒼茫所謂玉檻銅溝朱簾椒房理鏡之  
軒響屨之廊香煙蕪與露蔓紛日暮之牛羊況捧心之

百媚濯粉之餘粧者哉今則雲雨之巔仙聖是宅硯沼  
萼浮琴臺松岬封古蘚於井甃宿暗芳於洞穴木鯨吼  
以清厲金磬隱其蕭瑟彼方外之徒龜藏而蠖屈者又  
安知往古與來今方枯禪而縛律翩鴻影之拂坐見前  
山之銜日

問天醫賦 并序

余幼而氣弱常慕同隊兒之強壯生十四年大病瀕  
死至紹興壬申又十三年矣疾痛疴癢無時不有夏

至前一日得寒疾夢謁天醫省問荅了然獨未知天醫為何神案晉書卷舌六星其一曰天譏主巫醫而孫氏千金書以日辰推天醫所在其是歟皆未可必也雖然吾疾自是其有間哉乃敘其夢為問天醫賦

吳山之臞不達不聞有門常關日與病親歲直壬申亢中於昏薄寒中之不良睡眠覺邪夢邪陸離紛紜神馬具裝出於頂門驅風鞭霆莫知所從紫城翠樓千窓萬櫳玉書垂芒天醫之宮中有一人瑤冠紫衣如帝如尊



衆真繞圍我瞻而思是其天醫者邪竊樂其名幸已我  
疾次且而前再拜以出仰而稱曰蟣蝨之臣有鬱弗宣  
幸遭聖靈利用乞憐願賜清閒聽臣苦言天生下人如  
沙如塵長養安樂壽其天真臣獨多疾支離輪困炎黃  
之經厥病四百去半取半臣悉經歷五日一曳杖十日  
一卧箒茁為痊痲潰為瘡癰遊為痺頑尼為否塞疏為  
洞盪節為闢格躁為囁呼靜為爽惑榮衛挾寒而留行  
溪谷流溫而橫溢襲於皮毛客於絡脉次於焦府盡於

形色孿拳惰其四支黠黷淫乎大宅百骸九竅無一得  
適十巫遞進三醫更謁探金匱之寶藏紬玉函之祕策  
方書堆於几案藥物序於牆壁訪和扁以制度招桐雷  
使炮炙參以天泉左右之運列以君臣佐使之職配合  
者相須畏惡者相敵參朮芝桂鉛汞乳礫果菜之英醪  
醴之液萬歲之藟千年之珀莫潤於養血之茸莫溘於  
委蛻之酪厭速効於中和要近功於武力三建若燎五  
毒若螫入口如荼下咽如戟燥剛以發舒酸苦以湧洩

杵臼無停鳴鑪鼎不暇滌瞑眩酷烈疾戰縱擊外邪未  
潰中氣先踣久立則躄久行則蹙語多則逆卧多則惕  
先寒而裘未暑而綌席避風而五遷衣惡濕而再褰旦  
欲興而三休夜將誦而九息聽蟻為牛視朱作碧中憤  
憤其結轆頭岑岑而戴石人生世間居處飲食臣以病  
故跬步榛棘春醅珠紅暑醴玉白翠瓠之瓜青房之蒟  
泣梨液之流膚涌橋泉之破隙臣欲過門而大嚼黃媪  
推臣以避席清空沈寥霧旦霜夕駕牛西上騎鯨東極

納寒月於丰領御罡風於兩腋臣欲褰裳而徃從皓華  
挾臣以辟易弱柳怪其早衰瘦木嗤其多瘠怠侮出於  
家人煩勞困於僕役羣居之中軋軋厭厭狎者臣嘲疏  
者臣嫌獨疚臣身不可任堪人之多疾自取自探不一  
其凡大略有三其一者心根泄機命門喪阻明消精散  
形弊神苦擲温玉以畀火奉甘餐而戲虎陰惑陽而化  
蜮風落山而成蠱若是者得於晦淫命曰伐性之斧其  
二者愁莫愁於生離痛莫痛於死別哭不淚而神傷歎

無聲而怨結魂欲升而中斷腸將思而已絕孤憤為丹  
心之灰隱憂為青鬢之雪若是者得於情鍾命曰蠹心  
之孽其三曰深居與處溫煥窈窕重帷複幄風日不到  
朽然如火繫之匏蕭然如處陰之草玉體軟脆動輒感  
冒若是者得於貴遊命曰煬和之竈凡此三者臣非有  
之呻號弊疋誰職為之孰崇孰厲孰攻孰襲何方而來  
何門而入抑嘗聞之造化為爐人物為象洪鈞無心大  
放厥帑元陽之氣可斤可兩人受其中有瘠有臃故有

稟生多艱形枯德腴委隨惰窳命也何如子房所以辟  
穀長卿所以閒居士安散髮黽勉扶輿希逸愒愒疾與  
生俱天實為之非人速辜臣也不肖殆類此乎地產之  
藥方家之書媿寒配溫僻違怪迂欲持人以勝天嗟慮  
密而功疏竊聞大神天醫之王範圍堪輿運平陰陽起  
死回骸斡旋天藏揉太和以為劑酌沆瀣而為漿噓碧  
落以發英縻朝霞而薦芳神火氣筮日暎星芒度人千  
億奮飛仙鄉賜臣刀圭刮摩膏肓濡枯充虛豐羸植僵

解臣朽骨濯臣腐腸宅胎仙以葆真疑虛白而發光碎  
鼎槌鑪破瓢褫囊脫免彭殤之囿蛻蟬人鬼之場不老  
不衰來歸帝傍臣之願也非所敢望語未竟仰聞太息  
曰有是哉汝之憂也凡汝所苦可以理測凡汝所求吾  
不汝嗇病自汝得造化吾知汝窮汝原何藥之為今即  
汝身示汝三機隱几遐思載撫四維汝身塊然汝方火  
馳甘寐於牀委骸陳尸夢遊何方悲啼笑嘻溘焉以死  
烏鳶狐狸生汝安住死汝安歸形與化遷汝豈變移虛

空無傍奚所據依厥狀維何為青為黃為一為多為短  
為長未病何形已病何色癢苛酸辛誰覺誰識吾將遠  
遊汝速返去試用我言周徧求汝脫焉得之解痼釋痾  
不然已矣將奈汝何叩稽玉階退而下歸形開神澁汗  
濡寢衣嗚呼異哉為信為欺是邪非邪至今疑之

望海亭賦并序

會稽太守參政魏公作望海亭於卧龍之巔率其屬  
為歌詩以落成錄與書來且使賦之余謹掇其膏馥



之餘擬賦一首以寄後日獲從杖屨其上於山川之  
神尚有舊焉其辭曰

諸侯之客有來自東而姓會稽之遊者曰佳乎麗哉越  
之為邦也縈山帶湖樓觀相望背卧龍而崛起煥丹碧  
之翬翔躋攀下臨顧瞻無旁平疇蔚以穉綠喬木森其  
老蒼淙萬壑之春聲寫千巖之秋光朝霞暝霏扶疎微  
茫望山河之故墟吊草木之餘社夏后萬國之朝勾踐  
百戰之野興亡梗概猶有存者至於流觴泛雪高人之

舊事浣紗采蓮游女之遺跡鬱溪山之如畫尚彷彿其  
可識訪故老以問訊興慨歎於疇昔是為游覽之大畧  
而蓬萊觀風之所得雖然士固多感而況於對景以懷  
古撫事而凝情往往使人魂斷意折洒澹而歌不平故  
麗則麗矣而未擅乎登臨之勝也若夫浩蕩軒豁孤高  
伶俜騰駕碧寥指麾滄溟墮夏端於眇莽挹顛氣於空  
明飄飄焉有連黿跨鯨之意舉莫如望海之新亭嘗試  
登茲而望焉沃野既盡遙見東極送萬折之傾注艷寒

光之迸射浸地軸以上浮盪天容而一色珠輝具芒蟲  
竦橫霓快宇宙之清寬悵百年之偈仄當其三星曉橫  
萬境俱寂浴日未動晨光先激波鱗鱗而躍金天晃晃  
而半赤頰輪騰上東方皆白煙消塵作栖鳥振翼俯羣  
動而紛起寄一笑於遐覲永我暇日苒其將夕餞斜暉  
於孤嶂候佳月於滄浦沉沉上下杳無處所驚玉地之  
破碎漾銀盤而吞吐忽褰雲而湧霧獻霜影於庭宇夜  
色既合初聞鐘鼓觴屢至而不辭詩欲成而起舞又若

潮生海門萬里一息浮光如綫濤頭千尺方鐵馬之橫  
潰脩銀山之崩圻氣平怒濤水面如席吳帆越檣飛上  
空碧此亦天下之偉觀然猶未及乎目力燕香春容俗  
客莫陪神清意消徙倚徘徊天風激吹波濤闔開五雲  
明滅丹宮絳臺睇三山之不遠其為公而飛來遂招汗  
漫之勝游下飈車之逸軌屬紫霄之妙質侑玉笋之清  
醴勤歌鸞與舞鳳壽仙伯以多祉恍風雨之皆散但驚  
塵之四起悟真靈之不隔而何有乎弱水之三萬里也

憶昔之居此者多矣曾靡暇於經營遠山靈之効竒發  
遺址於巖扃殫妙巧於天藏超埃壒而上征極觀聽之  
所接遂杳渺而難名嗟此樂之無央與來者而同登決  
皆盪胸雪其塵纓且安知前日之蒼煙白露斷蔓而荒  
荆者哉顧客子之所能道者纔管中之一斑惟覽者之  
自得會絕景於憑闌心凝神釋浩如飛翰而後知茲亭  
之仙意而凌虛御風之無難主人瞿然而起曰有是哉  
吾將觀焉

惜交賦 并序

屈原既遭子蘭子椒之譖傷楚國之俗朋友道薄始  
合之難而終以輕背故著惜交之詞道知心之難遇  
故舊之不再得動心忍性徘徊不能去君子覽之有  
以增義合之重焉

余既有此淑質兮昔幽處而無仇悵佳人之眇覲兮走  
六漠而周求歲甲子之初春兮維元日吾始游紉木蘭  
以為蓋兮抗杜蘅以為旂詔凍雨俾清道兮戒日星使

燭幽恐駟驪之選軟兮又命飛廉而挾輶班天紘而驚  
列缺兮頰幽都與玄丘天地四方多賊姦兮忽吾班乎  
齊州恍神釋而目粲兮悅夫人之好修佩鞶轡之連璐  
兮戴陸離之高冠紛雞鷲之朋飛兮儼黃鵠之蹠蹠葆  
衆美以自畀兮夫何獨處之嬋娟吾恐始合之易兮終  
離者之不難號百靈而訊之兮筮告余曰吉哉予令巫  
咸往招兮介蹇修而為媒枉若人之嘉惠兮命保介而  
載予摻修袂而約言兮曰歲晚其與俱入既與之同袍

兮出又與之同車投我以蒼玉之連環兮予報以獨繭  
之曳緒玉宛轉而不斷兮繭紫紆而連續谷風習其自東  
兮固維風而及雨汝行前而予殿兮予安歌而汝舞至  
於今其十年兮固知美惡之必復敏予德而日新兮羌  
未變乎初也修予容其滋媚兮嗟采色其猶未暮也妬  
被離而害交兮讒翕脇而敗度雖君子之石腸兮固將  
徇乎市虎兩造膝而笑言兮慘其間之容斧予治容虞  
予善泆兮頽顏謂予汝怒髮甚短而怨長兮輿則固而



路艱蹇中道而如遺兮予既寡而汝鰥夫豈無他人兮  
焉有夫君之好賢雖得汝於萬一分終不及當時之纏  
綿彼日而食兮此月而虧物不終盡剝兮信復盈之有  
時涕承睫而交下兮若孟津之流澌敢誦言而怨慕兮  
恐衆人之汝窺曼子聲以悲吟兮託長風而要之政木  
石必回睽兮將白首而為期儻曾飛而不顧兮嗟此怨  
之誰歸

荔枝賦 并序

紹興丙子夏有自行都餉貢餘新荔子者坐客稱歎  
窮山所未嘗有呼酒更酌鼓琴以侑之且為之賦時  
為新安掾

吾聞南國之南水激而山蟠鍾具美於一物繁化工之  
所難捫絳綃以袷服襲舊桃而中單湛冰明之漼漼繁  
玉粒之團團菊生香之令芳泣仙液於微瀾走候置其  
萬里上玉宸與金鑿顧人間之流落纔千倉之一簞餉  
江南之病客索孤笑於顰端斥蜂蜜之黃膩謝佛桑之

紅乾覺龍目之么麼  
咄蒲萄之甘酸  
藉以秋雲之中薦  
以水晶之盤羞以燒春之浮醅  
相以流水之清彈  
迨風月之溫麗  
耿星河其未翻予一嚼而三  
嘖  
艷玉池之清寒  
恍醉夢之翺飛  
掖九天之風翰  
望涪江與閩嶺  
麾八極於雷轟  
方溟濛其路暗  
儵浩蕩其天寬  
岌芳宮與繡戶  
窈玉聲之闌珊  
歎荔枝之仙人  
若平生之所歡  
謂客子其少留  
紛擘綠而破丹  
招玉環於東虛  
御清空之雙鸞  
訪長生之舊曲  
有千載之遺歎  
悵三山之回風  
驚南

斗之闌干亂梧竹之滿庭渺雲海之漫漫

桂林中秋賦并序

乾道癸巳中秋湘南樓月色佳甚病起不觴客又祈  
雨蔬食清坐默念數年來九遇此夕皆不常其處乙酉  
值三館丙戌與嚴子文游松江有來歲復會之約丁  
亥又以薄遽走陽羨與周子充過於菴畫溪上戊子  
守括蒼己丑以經筵內宿庚寅北使次於睢陽辛卯  
出西掖泊舟吳興門外壬辰始歸石湖而今復踰嶺

歎此生之役役次其事而賦之

登湘南以獨夜兮挹訾洲之橫煙絳霄艷其光景兮湧  
冰鏡於蒼巔悵旻宇之佳節兮并四者其良難矧吾生  
之漂泊兮寄蘧廬於八埏九得秋而九徙兮靡一枝之  
能安上瀛洲而瀑飲兮當作壘之初元旋水宿於垂虹  
兮混金碧之浮天剋後期而竟爽兮忽罨畫之滄灣既  
戊子而守括兮摘少微於樓欄丑寓直於玉堂兮聽宮  
漏之清圓再西風而北征兮胡笳咽於夜闌迨返旆之

期月兮放苔雪之歸船幸故歲之還吳兮帶夕暉而灌  
園甘土偶之遇雨兮就一丘而考槃今又飄飄而桂海  
兮賓望舒於南躔訪農圃之昨夢兮杳征路之三十月  
亦隨予而四方兮不擇地而嬋娟諒素娥之我咤兮老  
色澹於朱顏仰觀月之曩見兮炯不動而超然適病餘  
而閉閣兮屏危柱與哀絃復訟風而閔雨兮謝鼎食之  
芳鮮聞清齋而晤歎兮驚足迹之間關誰職為此驅逐  
兮豈不坐夫微官知明年之何處兮莞一笑而無眠

楚辭

幽誓

天風厲兮山木黃歲晚晚兮又早霜虎號崖兮石飛下  
山中人兮孰虞予造軻兮挾輶紛不可兮此淹留靈擘  
兮遄邁趣駕兮遠遊予高馳兮雨濡蓋予揭淺兮水漸  
珮橫四方兮未極泥盜盜兮予車以敗望夫君兮天東  
南江復山兮斯路巉恍欲遇兮忽不見奄晝晦兮雲曇  
曇前馬兮無路稅駕兮無所誰與共兮芳馨獨蒼茫兮

愁苦

愁遊

君胡為兮遠遊蹇行迷兮路阻修朝予濟兮滄海靈胥  
怒兮蛟蹠舟暮予畧兮太行車墮輻兮驟決攀援怪蔓  
兮一息雷晝闕兮山裂四無人兮又風雨靈幽幽兮為  
予愁絕君胡為兮遠道委玉躬兮荒草與魑魅兮爭光  
與虎兕兮羣嗥君之居兮社木蒼然衡門之下兮可以  
休老歸來兮娑娑芳滿堂兮儻歌奉君子兮眉壽光風



蕩兮酒生波雲日兮同社月星兮偕夜千秋兮歲華弭  
予蓋兮繼予馬悲莫悲兮天涯樂莫樂兮還家

交難

美一人兮巖之扃珮璧月兮間珠星歲既單兮不圭幣  
路嶮絕兮遠莫致稼石田兮長飢誰與此兮執之藉予  
玉兮雙穀先予絺兮五兩不萬一分當此託長風兮寄  
想長風兮無旁吾媒乏兮鳳凰謂蘋若兮蒿艾鳳告予  
兮以不祥恐青女兮行秋奄銷歇兮衆芳寒芳華兮玉

蕤將以遺兮所思玉蕤兮霜露所思兮未知

歸將

輿不濟兮中河日欲暮兮情多子蘭橈兮蕙棹願因子  
兮凌波習壑兮以漁周落兮以驅驪龍兮飛度郊之麟  
兮去汝波河漬兮迷塗黃流怒兮不可以桴目八極兮  
悵望獨顧懷兮此都御右兮告病鑿鈴兮靡騁河之水  
兮洋洋不濟此兮有命

石湖詩集卷三十四

跋

先人嘗為莘等言自十四五始為詩文晚而采篤或  
寢疾醫以勞心見止亦以政自不能不爾謝之手編  
僅成帙而棄不肖之孤其尚忍言哉當從九京遊而  
未敢者以先人之志未承也詩文凡百有三十卷求  
序於楊先生誠齋求校於龔編修芥隱而刊於家之  
壽櫟堂春秋霜露思其志意思其所樂優然如見愜  
然如聞庶得藉口以告吾先人云嘉泰三年十二月

初三日革茲謹書

謹案卷三十二第一頁後八行三遷式里門刊本  
式訛莫據黃昌衢本改

第五頁後四行門冬如僕隸刊本僕訛佳今改

卷三十三第八頁前五行夢中觀何見只似三歲  
時刊本何訛河似訛是據黃昌衢本改

卷三十四第三頁前五行見前山之街日刊本日  
訛石據黃昌衢本改

第十一頁後二行予報以獨蒨之曳緒刊本脫之

字據黃昌衢本增

第十一頁後四行固知美惡之必復刊本之訛周  
據黃昌衢本改

第十三頁後四行默念數年來刊本脫念字據黃  
昌衢本增



總校官庶吉士臣侍朝

校對官編修臣楊壽楠

謄錄監生臣王泰雲